

PAPITO UN BIAHA MAS REY DI TUMBA 1994!!



**** Nos Rey di Tumba Papito, riba invitacion di Asociacion di Musico di Corsow lo ta na Corsow diamars otro siman. Papito lo ta presente na ocasion di entrega di premionan na e Rey di Tumba di Corsow 1994 Mr. Saab. Segun DEN AMBIENTE por a compronde cu e Rey di Tumba di Corsow Mr. Saab lo ricibi mas cu 20 mil Florin cash na premio. DEN AMBIENTE otro siman lo publica cuanto premio y efectivo cash e Rey di Tumba di Corsow a ricibi.**

DEN AMBIENTE di Carnaval 40



Jan Poets



**** Papito Raphael un biaha mas a sabi di corona su mes como Rey di Tumba, cu su tremendo tumba "E baile di Lole Piet".**

E Tumba aki a ser compone pa Casin Giel y aregla pa Arnel Salsbach y Demetry Frans. For di momento cu Papito y su Doble Sabor como e ultimo participante a cuminsa resona nan tumba, Papito a sabi di conquista e publico presente.

E Tumba aki "E baile di Lole Piet" tin su kicknan cu ne, pa cual tambe a ser aprecia pa e publico presente. Tabata visto cu na e manera cu e publico tabata goza y baila riba e kick di e Tumba aki, cu Papito mester ta den e finalistanan.

E competencia tabata fuerte mes den Aruba Entertainment Center, caminda e aña

aki tabata tin algun tumbanan di caliber y contenido. Pero tog mester bisa, cu falta ainda mas creatividad y inspiracion. Tabata tin hopi tumba cu pa varios añanan ta utiliza e mesun frasenan y melodia.

Tambe tabata tin varios di nan cu e melodia tabata leew di ta Tumba. Tabata tin hasta cu a bruha den Tumba y Tambu.

E presentacion di Papito y su Doble Sabor tabata fantastico, y mester elogia nan bunita "outfit" cu sin duda a bria riba escenario. Tambe manera semper Super Orquesta Qua-si ta presenta den nan diferente "outfitnan" ala estilo profesional.

Tambe no por lubida e tremendo presentacion di Original

Band, kendenan a bin hopi bon prepara cu nan belnan, pero lastima tabata tin un fayó den final. Pero un cos ta sigur, cu Original Band semper ta bon prepara y ta goza di un apoyo inmenso serca nan fansan.

Tokante e resultadonan, semper tin criticanan pa cual DEN AMBIENTE no ta haci caso, debi cu mester respecta desicion di huradonan.

DEN AMBIENTE no ta menciona e tumbanan cu a desepcionan y tampoco esnan cu a sobresali, pero ta felicitatur e participantenan, y pa traha mas duro pa otro aña.

Na Papito y su Doble Sabor un biaha mas PABIEN, y nos lo siña for di REY PAPITO con ta baila "E BAILE DI LOLE PIET" den Carnaval 40, sin tene CUENTA !!!

PAPITO A SIÑA JUANCHO CON TA BAILA "LOLE PIET"



**** Ayera mainta nos Rey di Tumba 1994 Papito Raphael, a haci un bishita di cortesia serca su Tata di Tumba Juancho Kock, den Horacio Oduber Hospital.**

Juancho Kock nos eterno Rey di Tumba a keda sumamente contento cu e bishita di su jiu Rey di Tumba. Durante e bishita aki Papito a canta y siña tanto Juancho y e enfermeranan con ta canta y baila "E baile di Lole Piet".

Juancho a declara na DEN AMBIENTE, cu su salud ta hopi bon y cu pa dialuna e lo ta na cas. E la sigui e festival di Tumba via radio, y su comentario tabata cu tabata tin hopi bon tumba, pero tambe tabata tin algun fatal. E ta sumamente contento cu e corona a bolbe keda DAKOTA !!!